

## lis Gnovis

### GRADISCJE IMPERIÂL.

Personis dal «Cara» e dal «Cpr»

Ai 23 di Avrîl, il gnûf prefet di Gurize al à stât a visitâ il «Centro di accoglienza per richiedenti asilo («Cara») e il «Centro di permanenza per il rimpatrio («Cpr») di Gradiscje. La visite e je une des primis che Raffaele Ricciardi al à fat di cuant ch'al è rivât tal Friûl gurizan, par dâi la volte a Massimo Marchesiello, stralozât a Udin. «Si scuen impensâsi simpri che duç chei ch'a son ali dentri a son personis – al à declarât par radio il puartevoûs dal guvier –. E duncje, noaltris o vin di curâ e di protezi i lôr dirits e la lôr situazion».

### TAVAGNÂ. La braûre di jessi autistics

La Fondazion «Progettoautismo Fvg» e je daûr a preparâ la celebrazion de «Zornade mondiâl pe cussience sul autism», ch'è cole ai 2 di Avrîl. In ch'è di, un pôcs di municipis de Patrie a saran iluminâts di blu, par marcâ il mes de zornade: i stralencs ch'a frenin i percors di autonomie des personis cun autism a van gjavâts fûr par fûr. Chest cantin al sarâ frontât, il prin di Avrîl, intant di une convigne «online» inmaneade di «Progettoautismo», a 11. Si presentârà il lûc internet gnûf de Fondazion, la convenzion par vierzi il «Centro diurno», rinovade cu l'Aziende dal Friûl centrâl par altris 3 agns, e la guide turistiche «Santa Maria in Valle per tutti», apenis saltade fûr a Cividât.

### NERT E CAS. Il paisaç dal Vajont

Al cjacare ancje par furlan il «Premi nazionâl dal paisaç 2021». Cul progjet vincidôr – «La biodiversità dentro la città: la Val d'Astino di Bergamo» –, la Comission dal Ministeri pai Bens culturâi e à stabilît di segnalâ ancje il Concors artistic internazionâl «Two Calls for Vajont Diga del Vajont e Nuovo spazio di Casso», presentât dal Cumon di Nert e di Cas ([www.twocalls.net/tc/?page\\_id=2](http://www.twocalls.net/tc/?page_id=2)). L'iniziativa culturâl e à cjapât une «Menzione», cun altris 8 progjets tor ator pe Italie.

### FOR DISORE. Comunità menaçade



Di ch'è strade de Coresime dal 2021, il «Circul fornês di culture» e il Comitât «Fortunato De Santa» a àn scrit une letare ingropade su lis cuistions ambientâls plui griviis dal plui alt Cumon dal Cjanâl dal Tiliment. Te sò «Lettera aperta a quanti amano Forni di Sopra», lis dôs clapis a denunziin l'insensibilitât de Aministrazion comunâl, de Region e di «Promoturismo» pal patrimoni naturâl dal país e pal paisaç. In specialitât, si conteste i progjets des stradis «Varmost-Valaseit» e «Tragonia-Cjasaveit» (ch'è savoltarès un «Sic» pupilât de Union europeane) e de piste pal ski «Simon-Crusicalas» («ferita ingestibile da evitare, con piste "nere", foriere di frane e ghiaioni»). Pai doi circui, «non si può continuare con gli insulti alla natura e non solo, il cui effetto è quello di lacerare l'armonia con l'ambiente (base di ogni turismo) e dividere la comunità».

Miercus 31	Miercus Sant	Domenie 4	Pasche Maiôr
Joibe 1	Joibe Sante	Lunis 5	Lunis di Pasche
Vinars 2	Vinars Sant	Martars 6	S. Guglielm
Sabide 3	Sabide Sante	Il timp	Bielis zornadis.



**Il soreli**  
Ai 31 al iève aes 6.49  
e al va a mont aes 19.34.



**La lune**  
Ai 4 Ultin cuart.

**Il proverbi**  
Ancje il lat di vacje nere al è blanc.

**Lis voris dal mès**  
Finit di cuinçâ lis vîts e i pomârs. Trarit i pomârs in mût che no vedin a patî dai parassîts.

# Cuintri de uniformitât

*Imprescj par difndi l'agrobiodiversitât vegetâl e zootecniche*

**A**i, blave, brocui, cevole, fastûi, lidrics, patatis, ravanei e sparcs e ancjemò dongje cjastinârs, ceriesârs, figârs e pomârs: te sezion furlane dal censiment de «Agrobiodiversitât vegetâl taliane», in zornade di vuê, a figurin chestis cualitâts di plantis pal ort, pai cjamps e pal bearç.

La tabele, ch'è pues jessi scrutinade tal lûc internet [http://vnr.unipg.it/PGRSecure/html/national\\_inventory.html](http://vnr.unipg.it/PGRSecure/html/national_inventory.html), e proferis il non scientific de plante, il pais dulà ch'è ven coltivade e i codiçs par identificâ lis aziendis o lis fameis ch'a àn salvât lis varietâts plui antighis e plui originâls de agriculture nostrane. Ancje chest patrimoni gjenetic straordenari al è in pericol, parcè che il model economic dal di di vuê, denunziât de Sinòde pe Amazonie come «predon, gjenocidiari e ecocidiari», no si contente di disvinidri i ecosistemis naturâi, marins e forestâi, ma al è daûr a savoltâ, uniformizâ e impuarî ancje i ecosistemis agricui. Cuintri di cheste agression, al opere il progjet «Valorizazion de biodiversitât dai teritoris di montagne, cun riferiment speciâl a l'agrobiodiversitât e ai siei derivâts: orizonts di "bio" e di "green economy" pe mont», puartât indevant di une convenzion fra il Dipartiment pai afârs regionâi e lis autonomiis de Presidence dal Consei dai ministris e il Centri «Ge.S.Di.Mont.» de Universitât de montagne dal Ateneu di Milan («Unimont»;



La siore Mirella cun Cile, ch'è je la vacje plui preferide de «Campagna Amica Mucca» (foto Graziano Soravito)

**Il model economic dal di di vuê al è daûr a disvinidri ancje i ecosistemis agricui tradizionâi**

<https://www.unimontagna.it>). Cognossi l'agrobiodiversitât vegetâl – a ribatin i promotôrs dal progjet – in plui di jessi necessari par protezile e par tignile cont, al è indispensabil par valorizâ e par popularizâ sistemis agricui e alimentârs unics e di alte cualitât, che dome lôr a puedin garantî un avignî sostenibil a la agriculture in mont. Par svilupâ l'iniziativa, «Unimont» e je daûr a slargjâ la rêt des colaborazions, ch'è cjape dentri bielzà l'inventari des «cultivar» locâls, curât de Universitât di Perugia, e l'inventari de Fondazion «Slow Food» pe biodiversitât. Cun di plui, a colaborin altris 200 realtâts locâls, notadis mediant da pagjine «Facebook», ch'a continuin a segnalâ di un continui

altris varietâts locâls discuiertis tai cjanâi plui rimits des Alps ([www.unimontagna.it/servizi/ma](http://www.unimontagna.it/servizi/ma) ppatura-agrobiodiversita-vegetale/). Sul stes stamp e cui stes fins dal censiment de «Agrobiodiversitât vegetâl taliane», si presente l'«Atlante delle razze autoctone - Bovini, Equini, Ovicaprini, Suini allevati in Italia», par cure di Daniele Bigi e di Alessio Zanon, ch'al è saltât fûr cu la seconde edizion, vie pal 2020. Ma sul cont de «Biodiversitât zootecniche», magari cussî no, la Patrie e risulte ancjemò plui mâl sestade, stant che la plui part des cualitâts nostranis di besteam grues e minût a jentrin te categorie «Estinta».

Mario Zili

## I cuatricent amîs dai nemâi di Cjamp Lessi

La «Campagna Amica Mucca», inmaneade de Latarie di Cjamp, cul jutori dal Ecomuseu des aghis dal Mandament di Glemone, e tire dilunc cence slaifs. In 4 agns di progjet, a son diventâts 400 i consumadôrs di mieze Italie ch'a àn adotât une des vacjis ch'a garantissin il lat necessari par produci il formadi glemonat, simpri plui preseât ancje in grazie des recensions di «Altreconomia», di «Vita in Campagna» e di «Bell'Italia». Biel planc, s'infuartis ancje la rêt des Latariis alpinis ch'a fondin la sò ativitât su la «Cjarte dai principis», madressude a Cjamp Lessi.

## Peraulis in dismentie par cure di Mario Martinis

### PODIN

s.m. = secchio di legno per attingere l'acqua (più piccolo di dimensioni della pòdine), piccolo mastello con due doghe sporgenti in fuori, forate, nelle quali si mette di traverso un bastone (da greco-latino pûtina "recipiente di legno")  
Cjol un podin di aghe e dâi di bevi ai cjavai.  
Prendi un secchio d'acqua e dai da bere ai cavalli.

### POLEÂ

v. = germogliare; maturare (continua il latino tardo pulläre "scaturire")  
Lis rosutis a polein tal zardin.  
I fiorellini germogliano nel giardino.

### POLEÂR

s.m. = pollice (dal latino pollex "pollice")  
Il gno poleâr no si plee come il to.  
Il mio pollice non si piega come il tuo.

### POLSÂ

v. = riposare (dal latino pausare "cessare, fermarsi", dal greco pausomai "cessare, mettere fine, fermarsi")  
A mieze strade o vin polsât un moment sot la olmesse.  
A mezza strada abbiamo riposato un momento sotto l'olmo.  
"Il mio cûr par tant che fasi, Nol mi lasse mai polsâ" (vill. ML 84)

### POLZET

s.m. = ragazzetto (da \*pulcetto, dal latino tardo pullicinus "pulcino", da pullus "pollo", da qui il senso di "persona sproveduta, impacciata")  
Ce ninin il gno polzet.  
Che caro il mio ragazzetto.

### POME

s.f. = frutto delle piante in genere, anche se si utilizza prevalentemente per mele, pere, pesche, ciliegie (dal latino pōmun "frutto", da pōmus "albero da frutto")  
Vuê in plaze la rivindiu e veve doi zeis di bielis pomis maduris.  
Oggi in piazza la venditrice aveva due cesti di bella frutta matura.